



JUDISIAL SISTEM MONITORING PROGRAMME
PROGRAMA DE MONITORIZASAUN DO SISTEMA JUDISIAL

Komunikadu Imprensa
6 Setembru 2012

Luta ba justisa no lialoos sai hanesan prinsipi ba familia vítima no vítima sira

Luta ba justisa no lialoos sai hanesan prinsipi ba familia vítima no vítima sira. Timor Leste nia luta ba independesia nakonu ho esperinsia defisil husi períodu diferente durante tempu okupasaun nian laran.

Ba ema Timor oan, fulan Setembru konsidera hanesan fulan ida ne'ebé nakukun (*negro*), tanbá iha momentu ne'ebá (Setembru 1999) antes no depois de 'konsulta popular' mosu masakre iha teritóriu Timor laran tomak hodi rezulta violasaun direitus umanus hasoru ema inosente.

Masakre sira ne'e hanesan masakre Setembru *Negro*, iha Suai, Masakre Tumin, Pasabe, Maquelab iha Oecusse, Masakre iha Lautem, Masakre iha Maliana, Masakre iha rezidénsia Bispo Dom Carlos Filipe Ximenes Belo nian, Masakre iha Câmara Esklesiástica Diocese Dili, no masakre seluk ne'ebé akontese antes iha Igreja Liquiça, inklui violasaun seksuál hasoru Ana Lemos iha distritu Ermera.

Akontesimentu istoriku hirak ne'e, sei nunka mais atu lakon husi Timor oan sira nia neon, liu-liu ba família vítima no vítima sira ne'ebé diretamente sofre husi akontesimentu hirak ne'e hotu, dehan Diretór Ezekutivu JSMP, Luis de Oliveira Sampaio.

Durante okaziaun barak, iha konferensia, iha soru-mutuk no biban sira seluk ita kontinua rona lian halerik husi familia vítima no vítima sira nian kona-ba justisa. Mesmu sira rekoñese difisil atu hetan justisa ba sira nia kazu tanbá la iha vontade politika husi nai ulun sira, maibé sira kontinua buka dalan no kontinua halo esforsu atu ezije estadu no autór resposavel sira bele kumpri sira nia obrigasaun hodi lori justisa ba sira.

Atu nafatin haburas loron istoriku sira ne'e, no dignifika sofrémentu no sakrifisiu vítima sira nian, JSMP rekomenda ba Estadu Timor-Leste atu komemora loron importante hirak ne'e husi nivel nasionál too nivel distrital.

Aleinde ne'e husu ba Estadu Timor Leste atu asegura katak loron istoriku no masakre sira ne'e inkorpora iha estoria nasionál luta nian atu bele transmite ba jersaun foun sira iha futuru.

Atu hetan informasaun Kle'an liu tan favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone :3323883/77295795